

HAFIZ AZIZ EF. ALILI

Predavanje, Lejle-i-Miradž, 28.06.2011.



Draga braćo i sestre, večeras se prisjećamo još jednog značajnog datuma, 2. mubarek noći, Lejletu-l-Mi'radža -Dana vakifa, 28.06. 2011.g. / 26. redžeba 1432.h.g.

Lejletul-Mi'radž je noć o kojoj govore i Kur'an i Hadis, a pod ovom odrednicom podrazumijevaju se Isra (ponoćno putovanje od Mekke do Kuds u Jerusalemu) i

Mi'radž (uzdignuće Božijeg poslanika do Sidretul-muntehaa), koji su se dogodili u istoj noći.

Prema povijesnim izvorima, ovaj događaj se zbio u jednom od najtežih perioda Muhammedovog, a.s., poslanstva, neposredno nakon senetul-huzna (godine tuge) u kojoj je Poslanik izgubio dva najveća oslonca, pomagača i zaštitnika među ljudima, h. Hatidžu i Ebu Taliba.

Poslije tog gubitka, Poslanik je išao u Taif da tamošnje stanovnike pozove u islam, ali umjesto pristanka protjerali su ga kamenicama i pogrđama.

U tim trenucima Poslanik je tražio zaštitu od Najvećeg Zaštitnika, pa ga Allah, dž.š., obradova Israom i Mi'radžom. Cijeli ovaj događaj je precizno izložen i do u detalje objašnjen u brojnim hadisima i povijesnim djelima.

U Kur'anu je o Israu zabilježeno: "Neka je slavljen Onaj Koji je proveo Svoga roba od Mesdžidul-Harama (Kabe) do Mesdžidul-Aksa (Kuds) čiju smo okolinu blagoslovili kako bismo mu znamenje Naše pokazali. Zaista On sve čuje i sve vidi." (El-Isra,1)

Na Miradžu je Poslanik uzdignut na najviše nebo i boravio je u blizini Uzvišenog Gospodara, prekoračivši granicu koju nije dopušteno prekoračiti ni samim melekima.

Tu je vidio znamenja koje ljudsko oko nije vidjelo, niti će vidjeti do Sudnjeg dana. Kur'an to potvrđuje riječima: "A vidio Ga je i drugi put, kod Sidretul-muntehaa, kod nje je džennetsko prebivalište. Kad je Sidru prekrivalo ono što je prekrivalo, pogled mu nije skrenuo niti je prekoračio. Vidio je najveličanstvenija znamenja Gospodara svoga." (En-Nedžm)

Nije precizno zabilježeno kada je bila noć Israa i Mi'radža. Sigurno je da je bila prije Hidžre, bez daljnjeg preciziranja, ali je pretpostavka da je to 27. noći mjeseca redžeba.

Pored predhistorije i tijeka Miradža bitne su i njegove blagodati.

Darovi miradža su:

1. Salat-namaz, najbitniji obred islama i prva manifestacija ibadeta,
2. Šehadet
3. Šefaat
4. Obećanje dženneta
5. Zadnja tri ajeta sure Bekare

No blagodat Kur'ana je i to što sura El-Isra tretira neka fundamentalna pitanja ibadeta i etike (akhlaka, morala) a dobro je znano da bez etike i njenih principa nema duhovnog, vjerskog ni moralnog uzdignuća čovjeka. Evo samo nekoliko primjera iz sure El-Isra, a koji tretiraju moralna pitanja:

- Daj bližnjem svome pravo njegovo, i siromahu i putniku–namjerniku, ali ne rasipaj mnogo, jer su rasipnici braća šejtanova;
- A ako moraš od njih glavu okrennuti, onda im bar koju lijepu riječ reci;
- Ne drži ruku svoju stisnutu;
- Ne ubijajte svoju djecu iz straha od neimaštine;
- I što dalje od bluda;
- A od imetka siročeta, što dalje, osim ako želite da ga unaprijedite;
- I pravo mjerite na kantar;
- Ne povodi se za onim što ne znaš;
- Ne hodi po zemlji nadmeno, jer zemlju ne možeš probiti, ni brda u visinu dostići;

Povodom Lejletul-miradža klanja se posebna nafilna namaz. Ova se nafilna sastoji od dvanaest rekata. Selam se predaje nakon svaka dva rekata. Na svakom rekatu, na kijamu, uči se Fatiha i sura Ihlas jedanput. Nakon namaza prouči se: "Subhanallahi vel hamdulillahi vela ilahe illallahu vallahu ekber vela havle vela kuvvete illa billahil aliyyil azim" i 100 x istigfar. Lijepo je ovu nafilu klanjati nakon jacija-namaza, a prije nego što se klanja vitr-namaz. Može se klanjati u džematu, ali je bolje pojedinačno i u samoći.

I kao što je Vjerovjesnik, a.s., na Miradžu razgovarao s Allahom, dž.š., tako i svaki vjernik u namazu s Njim razgovara i uzdiže se iznad ovog materijalnog svijeta u svijet Allahove blizine. Zato je namaz mi'radž vjernika, pa molimo večeras, između ostalog, da nas Uzvišeni pomogne u vršenju islamskih propisa, a osobito u obavljanju farz namaza.

MUBAREK LEJLETUL-MI'RADŽ!